



MALAYSIA MENGGESA PELAKSANAAN SEGERA PERJANJIAN GENCATAN SENJATA DAN AKSES KEMANUSIAAN TANPA HALANGAN KE GAZA

Malaysia menekankan keperluan mendesak pelaksanaan penuh dan segera bagi semua fasa perjanjian gencatan senjata, termasuk pertukaran tebusan dan tahanan seperti yang telah dipersetujui oleh semua pihak. Adalah penting supaya kedua-dua pihak mematuhi syarat-syarat yang dipersetujui untuk menghentikan konflik yang berterusan dan membolehkan penyampaian bantuan kemanusiaan yang amat diperlukan ke Gaza tanpa sebarang halangan. Sebarang kelewatan atau penyimpangan daripada perjanjian ini hanya akan memburukkan krisis kemanusiaan dan menjejaskan usaha berterusan ke arah keamanan yang adil dan berkekalan.

Situasi kemanusiaan di Gaza kekal kritikal, dengan lebih dua juta penduduk memerlukan bantuan segera. Bantuan kemanusiaan harus disalurkan kepada mereka yang terkesan tanpa sebarang sekatan atau syarat politik. Malaysia menggesa semua pihak untuk memastikan kelancaran penghantaran bantuan selaras dengan undang-undang kemanusiaan antarabangsa, keputusan Mahkamah Keadilan Antarabangsa (ICJ), serta Resolusi 2735 (2024) Majlis Keselamatan Pertubuhan Bangsa-Bangsa Bersatu (PBB). Bantuan kemanusiaan harus kekal bersifat neutral, tidak berpihak, dan bebas daripada campur tangan politik.

Malaysia turut menegaskan keperluan dalam usaha berterusan masyarakat antarabangsa bagi memastikan gencatan senjata membawa kepada penyelesaian yang mampan dan menjunjung hak serta maruah rakyat Palestin. Jalan ke arah keamanan yang berkekalan harus merangkumi penamatan sekatan dan kependudukan, serta penubuhan sebuah Negara Palestin yang merdeka dan berdaulat, dengan Baitulmaqdis Timur sebagai ibu kotanya. Malaysia juga terus menyokong hak Palestin untuk menjadi anggota penuh Pertubuhan Bangsa-Bangsa Bersatu.

PUTRAJAYA
4 Mac 2025